

# D R E N T I A.

*Divisio &  
Regimen.*

In Drentinis vero res etiam nunc sic habet : Dividitur provincia tota in partes ceu praefecturas sex : *Ding spil Suydevelt* nimirum , *Beyler Ding spil*, *Diverder Ding spil*, *Rolder Ding spil*, *Ding spil Nordevelt*, & *Ding spil Oostermoer*. Earum partium unaquæque quaternos habet iudices promiscue ex nobilitate & plebe rustica suffragiis lectos quotannis, quos sua lingua *Ettas* dicunt. Quorum officium est non solum suis in partibus per singulas septimanas jus reddere , & controversias litigantium finire , sed etiam ter quotannis simul omnes convenire , ad cognoscendas causas graviores , aut eas, de quibus ad supremum tribunal est provocatum. Moribus vero receptum est , ut *Roldæ* conveniant octavo post Pascha die , & rursus eodem post Pentecosten intervallo : postremo *Andloæ* ad *xiv* Calend. Septemb. Ultra id tribunal, quod aperto loco habetur circumstante multitudine, praeside vero totius provinciae praefecto , tendere litigantibus non licet. Praeter hos autem singulis in vicis iudex unus est , quem *Scultesium* vocant , & in his, qui autoritate antecedit in sua praefectura , eum praecipuo quoque titulo *Barmer-scultesium* nuncupant. Omnes suis in vicis operam plebi dant minoribus controversiis dijudicandis , & ad pignora quoque auferenda progrediuntur. Iurisdictio in universum talis , ut compendio lites finiat , haud parvo commodo populi. Sed exemptæ huic foro sunt , *Coverdia*, & *Runa*. hæc nobilibus parens ; illa praefectum provinciae totius, cui arx oppidana domi-

cilium praebet, iudicem superiorem agnoscens.

*WESTERWOLDIA* , Reideriorum quondam pars inter sinum & *Amasum* incolentium, solo, nisi quantum sinui *Dullarto* proximum est, fere exili paludosoque : in quos imperium legitimum habuit aliquot saeculis *Addingia* familia nobilis , *Weddæ* arcis vetustæ eodem in agro domina , *Westerwaldico* cognomine posteris quam gentili notior : nunc ad *Arenbergios* omnia translata : postremo suburbanum territorium regionis totius limitem ad austrum longo tractu contra *Drentiam* tuens, vicos ambitu suo continens *xii*, cœnobîa duo, ambiguo inter *Drentiam* ac *Frisiam* nunc expositam jure, quibus se debere hinc atque inde decerptis quibusdam partibus coagmentatisque videtur : lingua tamen, legibus, institutis per multa nunc saecula illam magis quam hanc referens. Antiquissimi ejus rectores *Gronenbergii* feruntur ; ab his ad *Selwerdios* : à *Selwerdiis* vicissim ad *Ultrajectinos* , *Geldros* , *Burgundos* ordine pervenit : *Burgundi* postremo Senatui populoque *Groningano*, nihil imminuto veteri vicinorum jure ac libertate, attribuerunt. Atque hujus in solo, ubi arenis gleba pinguior jungitur, editiore in dorso inter camporum humilia linguæ instar se porrigente, sedem habet *GRONINGA* , non maxima solum inter urbes, quas *Frisia* amplectitur, sed nomine etiam & potentia, & rebus gestis, & specie quoque ipsa antecellens : de qua in illius agro jamjam latius agemus.

*Westerwoldia Dominium.*



CIVICA BIBLIOTECA  
GIAN LUIGI LERCARI